

Headline	15 kumpulan aktivis kecam keputusan kerajaan Selangor		
MediaTitle	Sinar Harian		
Date	01 Sep 2021	Color	Black/white
Section	Nasional	Circulation	140,000
Page No	26	Readership	420,000
Language	Malay	ArticleSize	245 cm ²
Journalist	N/A	AdValue	RM 2,744
Frequency	Daily	PR Value	RM 8,232



15 kumpulan aktivis kecam keputusan kerajaan Selangor

SHAH ALAM - Gabungan Pertahankan Hutan Simpan Kuala Langat Utara (PHSKLU) mengecam keputusan kerajaan Selangor yang mahu meneruskan penyahwaratan Hutan Simpan Kuala Langat Utara (HSKLU).

Gabungan 15 kumpulan aktivis alam sekitar menerusi satu kenyataan menyifatkan keputusan kerajaan Selangor itu sebagai satu kegagalan dalam memegang amanah rakyat khususnya di negeri ini.

Malah, keputusan itu bertentangan dengan semangat dan keputusan Usul 26 yang disahkan 11 November tahun lalu oleh Dewan Undangan Negeri (DUN) Selangor apabila persidangan sebulat suara memilih untuk mengekalkan status semua hutan simpan di negeri ini.

“Permintaan untuk menarik cadangan ini berulang kali dikemukakan. Ramai pakar berhujah supaya mempertahankan sifat unik 8,000 hutan paya gambut di HSKLU iaitu salah satu kawasan terakhir paya gambut di selatan Selangor.

“Keputusan itu bercanggah dengan perancangan pembangunannya sendiri kerana HSKLU layak berada di bawah Ranking 1 Kawasan Sensitif Alam Sekitar dalam Rancangan Fizikal Negara Ketiga yang melarang pertukaran statusnya kepada kawasan pembangunan.

“Penukaran hutan akan menghasilkan 3.2 juta tan karbon dioksida dibebaskan, memburukkan lagi krisis iklim untuk negeri Selangor, negara dan dunia,” kata gabungan itu dalam kenyataan bersama pada Selasa.

Gabungan terdiri daripada Pusat Kebimbangan Orang Asli (COAC), Pusat Kesenian Lima, Pusat Alam Sekitar Global (GEC), Greenpeace Malaysia dan Persatuan Pencinta Alam Malaysia (MNS) Cawangan Selangor.

Sepuluh kumpulan lain yang turut mengecam tindakan kerajaan Selangor termasuklah ISI: Solidariti, Parti Sosialis Malaysia (PSM), Persatuan Aktivis Sahabat Alam (Kuasa), Persatuan Kesedaran dan Keadilan Iklim Malaysia (Klima Action Malaysia-KAMY) dan Persatuan Tindakan Alam Sekitar Kuala Langat.

Turut terlibat, Pertubuhan Alam Sekitar Sejahtera (GRASS) Malaysia, Pertubuhan Pelindung Khazanah Alam (Peka), Sahabat Alam Malaysia (SAM), Suara Rakyat Malaysia (Suaram) serta Treat Every Environment Special Sdn Bhd (TrEES).

PHSKLU turut memetik petisyen dalam talian yang kini mengumpul 130,000 tandatangan dan kempen di media sosial #hutanpergimana yang merekodkan 1,500 orang menyertai kempen protes terhadap Pengerusi Jawatankuasa Tetap Pelancongan, Alam Sekitar, Teknologi Hijau dan Hal Ehwal Orang Asli Selangor, Hee Loy Sian.

“Jabatan Perhutanan sendiri menerima lebih daripada 45,000 bantahan. Malah satu petisyen dalam talian juga telah mengumpul sekitar 130,000 tandatangan (bantahan),” kata mereka.

Pada masa sama, PHSKLU juga mengutuk keputusan untuk menyerahkan tanah hutan berkenaan kepada Gabungan Indah Sdn Bhd (berkaitan dengan Samling Strategic Corporation Sdn Bhd).

Tegas mereka, ia menunjukkan kurangnya kredibiliti dan ketelusan urus tadbir oleh kerajaan Selangor kerana menyerahkan tanah bernilai lebih RM6 bilion kepada syarikat baharu dengan modal berbayar RM1 yang tiada rekod prestasi.